

الفاجومي

الفاجومي في القاهرة

- في بولاق خطبتني «عبله» وعرضت مهراً بيتين
ودفترتوفير.
- يوسف السباعي.. عين في منظمة التضامن كل
أصدقاء الشباب والرياضة.
- كيف ابتسم الحظ للسفرحي في عيد ميلاد بنت
الباشا حرم البية؟

oboiikan.com

قال تعاشر يابن آدم تعاشر.. مسيرك يابن آدم تفارق.. الله يرحمك يا امه!
كانت فى لحظة الوداع الأليمه تهرب من وجع الفراق إلى بلسم الكلام:
- الغربه يا ابنى زى الموت.. علينا حق.. لكن برضه مسير الغرب يروح بلده..
وعلى رأى المثل: قالوا بلدك فىن يا جحا.. قال اللى فيها معاشى.
أنا قبل ليلة حوش آدم الأولى كنت مجرد مواطن عادى من رعايا جمهورية
الصين الشعبيه المعروفه إدارياً باسم: بولاق الدكرور.
كنت مأجر أوضه بعفشه ميه مشتركه فى بيت أم عبه التمرجيه باتنين جنيه فى
الشهر. طبعاً حتسألنى:
- وعرفت منين إن صاحبة البيت اسمها أم عبه?
ح أقول لك:
- من عبه ذات نفسها.
هى كانت - الله يمسيتها بالخير - مقيمه مع الست والدتها فى البيت القديم المواجه
للبيت الجديد اللى احنا ساكنينه. وكان شباكها مواجه لشباك أوضتى، وكانت بعد ما
ترجع من المدرسه تلزق فى الشباك مش أقل من خمس ست ساعات كل يوم.
ما اعرفش بقى كانت بتذاكر إمتى! وكانت طول ما هى قاعده فى الشباك تسبل
فى عنيتها للى رايح واللى جاى.
ويوم بعد يوم حصل النصيب واتكلمنا سوا وإذ بها تقدم لى نفسها بكل وضوح:
- ماما ماعندهاش غيرى.. والبيتين دول مكتوبين على اسمى بيع وشرا.. دا غير
دفتر التوفير اللى فاتحاهولى ماما فى البوسته.. وعلى فكره أنا لى اسمين.. زكيه على

اسم أم بابا الله يرحمه.. وعبله اللي في شهاده الميلاد.. إنت تحب تنادينى زكويه ولا عبله؟ أنا عندى دهب كتير.. بس مباحبش ألبسه فى البيت.

ولما طليت منها معاد نروح سيما ولا جنينه نتفسح واهى تبقى مناسبه تلبس دهبها وتفرجنى عليه بالمره، قالت لى:

- أكتب على عشان يبقى فى الحلال!!

أما إذا سألتنى:

- طب وعرفت إزاي إن أم عبله تمرجه؟

الموضوع ببساطه شديد مجرد خلاف عيادى بين الست أم عبله باعتبارها صاحبه البيت والست أم لبيبه باعتبارها ساكنه فى البيت. كان الخلاف على فلوس الكسح. ما تفهمش إيه أظنى فؤاد الست عبله وخلاها تتدخل فى الحوار.. والشهاده لله أنا ما سمعتش هى قالت إيه بالظبط أنا فؤجت بالست أم لبيبه بتضحن على كفوفاها ويتدرع ويترقص وتتنطط زى اللى لاشتها عقره وبتقول لعبله بالفم المليان:

- بيت إيه دا يابت يام بيت.. دانتوا بانيسينه من سرقة القطن والشاش والمرهم واليزول وأكل العيادين فى القصر العينى.. وإن شاء الله حيدر يك على دماغ اللى فيه طوبه طوبه لأنه من أساسه حرام فى حرام.

المهم إنى وأنا باصفى النفوس كما هى عادتى سألت الست أم لبيبه:

- هى الست أم عبله موظفه فى قصر العينى؟

قالت لى وهى بتدرع فى وشى نى.

- موظفه؟.. دى حياالله حتة فراشه لا راحت ولاجت.. ولايكن خدك الشهاده

الكبيره واحنا ماندراش.. سلامات يا موظفين.

عموماً مش دا موضوعنا لكن الكلام بيحيب بعضه.



أنا لما اتعيتت في منظمه التضامن بدأت تراودنى بشده أفكار غريبه عن الاستقرار والانتظام فى السلك الاجتماعى، وبدأت دماغى تشتغل فى هذا الاتجاه لدرجة إنى وضعت برنامج ما يخرش الميه.. برنامج متعدد المراحل.. المرحلة الأولى منه كانت تجهيز عش الزوجيه عشان تيجى بنت الحلال تلاقى عشها كامل الأوصاف مما جميعه.. لذلك مامرش أربع شهور إلا وكان البيت بيشغى عش.

أولاً: استلقتت سرير حديد سفرى من بتاع الروبايكييا. ومن برأ برأ خدته ع الأسطى عربى البوابرجى مشى لى عليه باجور اللحام قضى على بيض الأكلان المعشش فيه. وزياده فى الاحتياط رميته ع السطح أسبوعين يتحمص فى الشمس.. وقلت جايب لك علبه لاكميه لبنى وفرشه وخذته وش بقى عروسه.. واشترت له لوح سفنج فصلت منه مرتبه ومخدتين.. ويشاء السميع العليم إنه تفضل حته سفنج رحت عاملها خداديه.. وعشره متر دبلان ٢٢ عملت منهم كسوه.. ونزلت لك على سوق الحد فى إمبابه اشترت بطانيه جيش مصرى قديمه ورحت ناقعها فى علبه رابسو ثمانيه وأربعين ساعه طلعت جديده.. وع الحاج مرسى بتاع القديم اللى فى شارع همفرس ولقيت عنده تراييزه نصها الفوقانى حديد ونصها التحتانى خشب.. خدتها.. وعلبه لاكميه من نفس لون علبه السرير وخمس وشوش بقت لك مكتب.. دا غير بقى مستلزمات المطبخ وأهمها سبرتايه ياسين شديده كنت باطبخ عليها وأعمل الشاى والقهوه وأدمس الفول وأسخن الميه إذا احتكم الأمر وقررت أستحمى.. ولسه طبعاً كنت ح اكمل المسيره، لكن لما جوالى ما جوالى فى ليله حوش آدم وسعد الموجى والشيخ إمام بدا مخى يركب وحساباتى تتلخفن واتبخرت من دماغى أفكار الاستقرار واتدمرت مزاعم العش الهادى ومشروع التكيف الاجتماعى ودوبان الجزء فى الكل إلى آخر الكلام الحلوه..

الأول كيفته قانونى.. القانون بيقول إن حق المالك يكسر باب العين لو الساكن غاب ثلاث شهور بدون دفع الإيجار.. وفى الحاله دى تصبح محتويات العين ملك صاحب الملك ياخذها سداد حق..

طب نحسبها.. اثنين جنينه قيمه الإيجار الشهري في ثلاثه يبقوا سته جنينه.. يعنى لو أم عبله كسرت باب العين بعد ثلاث شهور حتلاقي عفش ومنتقولات في حدود أربعين جنينه بالميت.. بيقنى أنا ماسرقتهاش.. إذن وداعاً بولاق الدكروور.. وعلى رأى المرجومه أمى:

- تعاشر يابن آدم تعاشر.. مسيرك يابن آدم تفارق.



عملت الاستطلاع اللازم لأوضه محمد على لقيت خمس كراسى قش مكتوب على ضهورهم أسماء القهاوى اللى كانوا شغالين فيها قبل ما تقول ملكيتهم - الله أعلم إزاي - لمحمد على.. طب لزوم القعاد أهه.. أدور على حاجه لزوم النوم.. أبداً.. ولا الوتكه.. وقبل ما يتسرب اليأس إلى نفسى لمحت شوالين محشين شراميط مفروشين على الأرض بدل سجاد وطنافس.. قلت ف عقل بالى: هما دول.

سألت محمد على:

- هو أنا أقدر أنام هنا؟

قال لى:

- إنت تقدر تنام فى أى حته.. بس حتنام هنا فين؟

قلت له:

- هنا فى الأوضه دى.

قال لى:

- أما أمرك عجيب.. حتنام هنا على إيه؟

قلت له:

- ع الشوالين دول.

قال لى:

... دول مليونين تراب... ..

قلت له:

- أنفضهم..

قال لي:

- ولما يبجي الشتا تحتغطي بياه.. إعمل حسابك أنا ما عنديش غطا غير اللحاف
الوحداني اللي جوا..

قلت له:

- يا سيدى لما يبجي الشتا يكون خلق فى قضاة رحمه واشترينا شوالين للغطا..

قال لي:

- إنت يا ابني مش بتقول إنك شاعر فى الإذاعة؟

قلت له:

- خلص فى الكلام.. أنام هنا وأدفع لك الإيجار؟

قال لي:

- ما تنام.. هو أنا ماسكك؟!

رحت مطلع مفتاح أوضه أم عبلة ومطوحه على آخر إيدى نزل فى الأنتيكة اللي
هى بيت السيد جمال الدين الذهبى أو شيخا جمال الدين شاهبندر تجار مصر
المحروسة على أيام الفاتح محمد على باشا الكبير رأس الأسره العلويه المالكه
ومؤسس مصر الحديثه.. والله أعلم..

الصبح نزلت على شغلى اللي هو السكرتاريه الدائمه لمنظمه تضامن شعوب آسيا
وأفريقيا وأمريكا اللاتينيه الكائنه بشارع عبد العزيز آل سعود بالمنيل.. قصر جميل
ومحندق كان بتاع واحده من نساوين العيله المالكه واستولت عليه الثورة وسبخان
من يرث الأرض ومن عليها،

كنا بنمضي حضور الساعه تسعه الصبح ونمضي انصراف اتين بعد الظهر.

أنا كنت صحيح لا شغله ولا مشغله.. لكن كنت قاعد في مكتب عقبال أملتك بالتكليف والتليفون وصدق اللي قال يرزق الهاجع والناجع والنايم على بت ودنه.. لكن زي ما يقولوا الحلو ما يكملش.. مقعدين معايا واحد زي برضه لا شغله ولا مشغله كان متطوع سنه ١٩٤٨ في حرب فلسطين فخلده رصاصه في فكه رحلت فتحه بقه جنب ودنه الشمال ومع هذا لا يكف عن الرغى طول ما هو قاعد لدرجه إنه جاب لى صداع دايم وأحياناً كان وشى بينمل كأنى متبنج وهو ما فيش فى قلب أمه أى نوع من أنواع الرحمه، والمصيه العظمى إنه كان متصور نفسه شاعر وكان بيكتب عشر قصايد ولازم يقريهم لى ويناقشنى فيهم وده مثلاً نموذج من شعره:

شرايين اليأس تتفجر فى أحقاد الضغينه وعروق اللفت تتلوى فى أوحال المدينه والشمس ترقص..

على ورق المشمش.

مبنى المنظمه كان مكون من ثلاث طوابق الطابق الأول فيه شئون المستخدمين والخزينه والمطبعه والأرشيف والشئون الإداريه والشئون الماليه.

مدير شئون المستخدمين كان اسمه الأستاذ حسن الإمام ودا كان ظابط فى سلاح الفرسان ولما طلع ع الاستيداع لجأ للأستاذ يوسف السباعى فعينه فى المنظمه والحقيقه إن المرحوم يوسف السباعى كان رجل طيب وشهم والدليل على كده كميته البشر اللى عينهم فى وظائف هامه وهما مالهمش أى لازمه.. مجرد أصدقاء الشباب والرياضه!

وكان أخونا حسن الإمام متصابى وصابع شعره وحواجبه وكان عنده فى المكتب قبقاب وأبريق صباح زي بتاع المستشفيات وسجاده للصللا وكان بيلعب حواجبه للنسوان ومره على المطبعجى ضبطه بيضرب عشره فى الحمام.. وساومه على عدم الفضيحه فى مقابل إنه مايخصم لوش الربع يوم بتاع التأخير لمدة سنه، ومع ذلك فضحه برضه.. آمال إحنا عرفنا إزاي؟

وكان مدير الشئون الإداريه الأستاذ زكى شنوده المحامى، ودا كان بيتعامل مع

نفسه باعتباره وزير.. ليه بقى؟ هو يا سيدى كان عضو فى حزب الكتله الوفديه اللي كان رئيسه مكرم عبيد باشا المحامى والسياسى الشهير أيام الأحزاب والملك فاروق ورغم إن حزب الكتله كان يفتوز فى أى انتخابات تشريعيه بعدد مقعد واحد فى البرلمان إلا أن الأستاذ زكى كان عنده أمل إنه حييجى اليوم اللى حزب الكتله يفتوز فيه بأغلبه ساحقه ويشكل الحكومه ويبقى هو وزير فيها ووزير العدل على وجه التحديد.

أما مدير الشؤون المالىه فكان اسمه عم مهدي ودا كان باشكاتب فى الخاصه الملكيه وخدوه مع الأسلاب، وكان ممكن يتعامل معامله أسرى الحرب لولا عبقريته فى تسويه الحسابات وسد الخانات وتسديد الفواتير حاجه كده تفكر بشرفنطح لما بيطلع ناظر عزبه فى أفلام الريحاني وكان دمه خفيف جدا وعينه صاحيه رغم إنه شارف على السبعين من عمره المديد.. كان لنا زميل بيقتضى طول اليوم نايم ع المكتب وكان عم مهدي يقول:

- سيوه.. نوم الظالم عباده.

ومره زميلنا ده غاب بسبب المرض ولما طال غيابه رحنا نزوره فى البيت ومعانا عم مهدي ولما خبطنا ع الباب طلعت مراته وقالت لنا إنه نايم فقال عم مهدي:

- هو بينام هنا كمان؟

وانفجرت الست بالضحك واحنا معاها.

نطلع بقى الدور التانى وطبعًا حنبداً بمكتب السكرتير العام اللى هو يوسف بيه شخصياً وما ملكت يمينه اللى هما الفتى المعجبانى الأيضانى الحليوه الأستاذ حسين سكرتيره الخصوصى ودا بالنسبه للموظفين لا يهش ولا بيتش.. أما العقربه الصفرا أم زبان فهو مدير مكتبه اللى شكله بيغفرك بكفار مكه اللى بيطلعوا فى التلفزيون.. وش مكفهر وعين مليانته خبث ودناءه بيثعوا من ورا قزاز النضاره السميك ودا أصله كان سفرجى عند الملك وألت ملكيته للدوله بعد الثوره فعينوه ساعى فى مجلس الفنون. مجرد ساعى فى ركن مهمل.. ما تعرفش إزاي فضل يزحف زى

الحشره لغايه ما قرب من مكعب يوسف بيه فى المجلس (ما هو يوسف بيه برضه كان سكرتير مجلس الفنون) وانهز فرصه غياب الساعى الخصوصى وعمل القهوه وقدمها ليوسف بيه على الطريقه الملوكى فيوسف بيه استكيف فقال لهم: الولد ده يبقى الساعى الخصوصى بتاعى فبقى الولد ده الساعى الخصوصى بتاعه.

وروح يا زمان وتعال يا زمان وأشرق على الدنيا بنوره يوم عيد ميلاد دولت هانم كريمه طه باشا السباعى وحليله يوسف بيه وطبيعى يقدم الزوج الرقيق هديه جميله تليق بالمناسبه السعيده وكانت عبارته عن سجاده فاخره من محلات إسماعيل على.. وكانت المناسبه فى فرصه العمر للسفرجى الملكى للقفز إلى أعلى.. وقد كان.. هما كانوا خدوه بناء على طلبه لتنظيم البوفيه على الطريقه الملوكى.. أتارى ابن الحرام كان جسمه فى المطبخ ودماعه كان فى حته تانيه..

وصلت النص نقل بالسجاده وباحليوه الأبيضانى واشتغلت زغاريت الخدم وفردوا السجاده التحفه على الأرض للفرجه وفوجئوا بالسفرجى يقول لسواق النص نقل بمتهى الحزم:

- استنى ما تمشيش.

وقبل ما يستوعبوا المفاجأه كان هو موطى ع السجاده ويفحصها كخبير ملكى وبعد ما عمل كام حركه ملكيه اتجه مباشره للأستاذ حسين الحليوه الخصوص وسأله:

- بكام جيتوا السجاده دى؟

وارتبك الأستاذ حسين لكن هزه من راس يوسف بيه شجعتة على الإجابة.. فقال باستعلاء واستنكار:

- بكذا.. لكن بتسأل ليه؟

عمل ما سنعش الجملة الأخيره وسأله:

- فين الفاتوره؟

قدم له حسين الفاتوره فحفظها منه وقال لسواق النص نقل:

- لف السجاده وتعالى معايا..

الله أعلم بقى يوسف بيه وأهل منزله تصوروا إيه؟.. هل السجاده مضروبه؟ هل السفرجى حينغيرها بسجاده ملكيه؟ المهم إنهم كانوا فى حالة إعجاب وثقه فى ذوق السفرجى الملكى العجيب!!

هى حسبه نص ساعه وكان راجع لهم بنفس النص نقل ونفس السواق ونفس السجاده لكن الفاتوره اتغيرت.. نقصت خمسين جنيه قدمهم ليوسف بيه فرق شطاره.. أثاره ابن الحرام راح لمحلات إسماعيل على وطلب منهم فاتوره بمبلغ أقل ودفع الفرق من جيبيه ومن لحظتها استولى على قلب وعقل ومفاتيح وأختام وأرقام حسابات يوسف بيه فى البنوك وفضل يترقى اجتماعياً حتى دخل نادى أصحاب الملايين ووظيفياً لحد ما وصل لدرجه وكيل وزاره! وكل شىء فى مصر جايز.

